

Fasnecht 2019



Sujet:

Lieschtel will attraktiver si und d Chnobis sind mitem neue Wage drbi

Veränderige bruchts, do sin mir eus einig
Ob guet oder schlecht, dasch jedem sini Meinig
Meistens bruchts immer es bizzli bis mir alli begriffe
Ob d Veränderig guet isch oder mä s liäber hät loh schliffe

In Lieschtel passiert grad unglaublich vill
Kei stei blibt uf em andere, alles neu isch s Ziel
Öb am Bahnhof, im Stetdli oder in dr Allee
Fast monatlich chunnt Lieschtel mitere neue Idee

Dr Luki Ott dä kenne mir no vom letschte Joor,
Sini grosse Ideeä werde allmählich wohr
Dr Rothuusstroos söll luut ihm die wichtigsti im Baselbiet werde
Im Vergleich zu Sissach sin mir aber no Meile wit drnäbe

Au am Bahnhof isch schon einiges passiert
Es moderns lhgangstor zu Lieschtel het me kreiirt
E grosses Bürogebäude het den au no müsse cho
Damit viel vo de Pändler direkt ins Gschäft chön go

Mir säge, in Lieschtel wird aber niä öpis laufe
Alles zverstreut und jede goht neume anders go ichaufe
Mä versuecht zwar vill, chunt aber nid recht vorah
Kei Wunder, will dr Ott isch jo selber nüme dra

Lieschtel baut us dr Allee en See
Mir Chnobis finde das e geili Idee
Churzerhand es eignigs Schiff konstruiert
Und ä zuekünftigi See-Fasnacht inszeniert

Nach über 30 Joor hän mir eus no en neue Wage gleistet
Viel hän mr mitem alte erläbt, und immer hei mr begeisteret
Als Stadion, Tankstell und Fläsche simmer scho cho
Au d Brauerei, dr Aldi und s Chasperlitheater sin e Teil drvo

Dr Neu isch grösser, länger und moderner als unsere Alte
Aber mir werde ihn immer in gueter Erinnerung bhalte
Zur fiir vom Alte, zum neue und em Lieschtler-See
Werdet ihr uns das Joor mit schönem Frack und Hemli gseh

Mir Chnobis denke es git Zyte wo me mues investiere
Sött aber die alte Wert nid us de Auge verliere
Mir sin überzeugt Lieschtel hets begriffe
Si düen jo au immer uf d'Chnobi-Idee zruggriffe